


BULONGAME BWÀ ÈKÈLEEZIYÀ

 Tudi tufùma ku dijikija disangisha dinène dyà malòòlò àtaanu ku tabernacle, mwômù amu, ku ngàsà wa Nzambi nè ku dikwàcisha Dyèndè, ndi muteetè bikolè, ku Mifundu, bwà kutèeka Èkèleeziyà wa Mukalenge Yesù Kilistò mu bulongame, mùshindù utùdì twitabuuja ku Branham Tabernacle.

² Cintu cyà kumpàlà cîndì njinga kwamba ncyà nè mpaasàtà ùdi misangu yònsò ànu nè bujitu mu kaabujimà bwà tabernacle ewu pândi nciyipu to, nè pândi ngàalukila ndi ntàngila ànu kùdì mpaasàtà. Pa nànkù, yèyè ùdi nè bujitu mu kaabujimà bwà kushintuluka anyi bwà kwenza cyònsò cidiye wela meeji nè ke cidi citàmbe bwimpè aci, ku bulombodi bwà Nyumà Mwîmpè, pândi nciyipù.

³ Tudi twitabuuja Èkèleeziyà wa bàpostòlò, ùlongesha mabènesha à bàpostòlò bwà bantu bàà ditùkù edi. Tudi twitabuuja Èvànjeeliyò mu kaabujimà, nè twitabuuja nè bimanyinu byònsò nè maalu à kukèma byàkambiibwà kùdì Mukalenge wetù Yesù Kilistò abi, bivwa mwà kufila Èkèleeziyà Wendè too nè pàalukilàYe. Tudi twitabuuja bintu abi, nè twitabuuja nè bidi nè cyà kutèekiibwa mu bulongame, nè Èkèleeziyà ùdi nè bulongame bwèndè. Nè èkèleeziyà nè èkèleeziyà yònsò ùdi nè malongesha èndè, nè bulongame bwèndè, nè dikàzamuna dyèndè.

⁴ Èkèleeziyà wetù kènà nè bidimba bu bàdi balwè kushààla bàà mwòmù to. Tudi twitabuuja nè Èkèleeziyà mujimà wa buloba bujimà wa Nzambi udi nè mwoyi mbànà bèètù bàà balùmè nè bàà bakàji; nè bantu bònsò abu tudi ànu tubàjingila difika dilenga, katùyi tutàngila dîngumba dyàbò to, mu Branham Tabernacle, mu Mùsèèsù wà Mwandamukùlù nè wà Penn mu Jeffersonville, mu Indiana.

⁵ Tudi twitabuuja “dibingishiibwa ku diitabuuja,” Loomò 5.1. Tudi twitabuuja nè, paanyimà pàà muntu mumanè kubingishiibwa ku diitabuuja, ùdi mu ditalala nè Mukalenge Yesù Kilistò. Kàdi bidi mwà kwenzeka nè muntu umweumwe ewu ìkalè nè biibidilu bu mùdì byà kunwà maalà, kunwà mfwankà, kwenza bintu bivwàye kàyì nè cyà kwenza to, biibidilu byà bukooyà byà mubidi.

⁶ Pashiishe tudi twitabuuja nè Mashi à Yesù Kilistò àdi àjidila muntu ewu bwà mudimu wà Mukalenge. Nènku mbwena kwamba nè, tudi twitabuuja “dijidiibwa” bilondèshile Ebèlù 13.12 nè 13 nè: “Kùvwà kàbìdì Yesù, bwà Wàmòna mwà kujidila cisàmbà nè Mashi Èndè Sungasunga, mukènge pambèlù pàà biibi.” Nè tudi twitabuuja nè dijidiibwa ndilongèshiibwe mu Dipungila Dipyadiyà, nè divwa nè mushinga bwà beena

kwitabuuja mu cikondo cyà Dipungila Dipyadipyà, citùdimu nè mwoyi mpindyewu eci.

⁷ Nè tudi kabìdì twitabuuja nè paanyimà pàà muntu mumanè kujidiibwa, biibidilu byà bukooyà abi bimanè kuumuka muntu awu, yêyè mmwena kwitabuuja wa Mukalenge Yesù Kilistò, nè biibidilu byèndè abi mbiyè: tudi twitabuuja nè dîbà adi yêyè mmuntu mudilongòlòle bwà “dibàtiiza dyà Nyumà Mwîmpè,” didi dilwa bu dyujiibwa dyà mwena kwitabuuja. Nè pashiishe pàdì mwena kwitabuuja . . .

⁸ Bidi ànu, ànu munkâdi mucilongeshe misangu yàbûngi amu, bu mùdi kwangula verre mu lupangu lwà nzòlo amu. *Dibingishiibwa* mbwena kwamba nè “kumwambula, mwikàle pabwîpì bwà kukwàta nendè mudimu,” mwikàle nè kiipàcilà mu mwoyi. Ke cidi Nzambi wenzela ngènzàmpèkààtù ncyòci aci. Yêyè ùcidi ànu mukooyike.

⁹ Pashiishe ùdi ùkezudiibwa ku Mashi à Yesù Kilistò. Nènkù mwâkù *kujidila* mmwâkù mwikàle nè bitupà bibìdì, wùdi wùmvwija nè, “musukula, nè mutèeka ku luseke bwà mudimu.” Mu Dipungila Dikùlukulu, cyoshelu cìvwa cìjidila dibùngù, nè òvwa ditéekiibwa ku luseke bwà mudimu.

¹⁰ Tudi twitabuuja nè Nyumà Mwîmpè ngudi munkaci mwà kutèeka dibùngù òmwèdìmwè adi ku mudimu. Bwà nè Nyumà Mwîmpè kí ncitupà cikwàbò cyà ngàsà to, kàdi nngàsà umweumwe awu mutàmbidìle udi uuja mwena kwitabuuja bwà kufika mwaba ùdi bimanyinu nè maalù à kukèma, bu mùdi mapà à cipostòlò àdì mamba mu Kolintò wa Kumpalà 12, à òmwèneshila ku mwena kwitabuuja ewu pàdì Nyumà Mwîmpè ùbwela bwà kwangata dipà adi.

¹¹ Mémè ndi ngitabuuja nè Mifundu yidi yilongesha nè “mapà nè mabiikila kí mbyà dinyingaleela to,” bwà nè patùdì tulediibwa pa buloba ebu, tudi batùmiiibwe pànwapa mu kiipàcilà kàmwè, mbwena kwamba nè, kàà Nzambi. Nè ciinè aci kumpalà mene kwà twètù kulwa bantu bakùlumpè, patùcidi ànu bânà, mapà atùdì naawù kùdì Nzambi àdì munda mwètù ànu piinè apu, nè ànu dyùjiibwa dyà Nyumà Mwîmpè ndidì ditéeka mapà aa mu mudimu; kàdi tudi naawù ku cibangidilu, bu mùdi balongeshi, nè bàpostòlò, nè—nè baprófetà, nè mapà à nyakulu, nè mapà citèemà à nyumà bilondèshile Kolintò wa Kumpalà 12. Mpindyewu, tudi twitabuuja nè mapà aa àdì munkaci mwà kukwàta mudimu leelù ewu, nè bivwa bikèngela kwikalawù mu èkèleeziyà yònsò wa pa kaaba.

¹² Nànsha mùdibi nè mu byà nànkù awu, tudi basangàne, pa buloba bujimà, nè kùdì dikolesha dyà maalù dyàbùngi dikwàte bantu bàdì bàjikula nè mbeena kwitabuuja bàà cìipostòlò. Ànu mùdibo mu malongolodi makwàbò amu, nè bikwàbò, tudi nè bakoleshi bàà maalù. Abi bivwakù kwònsò eku, tutu naabi munda mwà bikondo. Bàvwa naabi mu ditùkù dyà bàpostòlò; nè

ànu mwàkambà Pòlò kuntwaku, mùshindù wàkalwà bakwàbò nè “kubènzejabò bwà kuumuka, bènda bàlonda malongesha makwàbò,” nè bikwàbò. Kàdi mu dilongesha dyèndè yéyè mwinè, wàkamba nè: “Bu Mwanjèlò wa mu Dyulu mwà kulongesha cingà cintu,” cidi kaciyi civwàye mulongeshe, “mulawu ùmukwàtè.”

13 Pa nàнку, twètù, bu Branham Tabernacle, mu Mùsèsù wà Mwandamukùlù nè wà Penn emu, tudi tuteeta kulonda malongesha à Dipungila Dipyadìpyà. Bwalu tudi twitabuuja, nè, Yesù Kìlistò, mwikàle Mwànà wa Nzambì, nè Pòlò mùpostòlò ùvwa lupànà lubiikidiibwe nè lusungula, ku disungula dyà Nzambì, bwà kutùmiibwa kùdi Èkèleeziyà wa bàà Bisàmbà byà bendè bwà kumutèèka mu bulongàme.

14 Mpindyewu, tudi twitabuuja “dibàtiiza dyà mu màyi,” mu Branham Tabernacle, ku diinyijiibwa dyà mu màyi, “mu Dìnà dyà Mukalenge Yesù Kìlistò,” didi diikàle dilongesha dyà bàpostòlò dyà Bible. Nènku swáyikù bwà, bidimba byònsò byà, anyi, balu bàà mu Branham Tabernacle emu, bàdi bàjinga nàнку awu, swáyikù bwà, pa díbà kanà dyònsò (bàlòmba bwà kwinyijiibwa mu màyi, mu Dìnà dyà Mukalenge Yesù), swáyi nùmònganè nè mpaasàtà, nè bóbò banyingàlále, nè biitabùuje Mukalenge Yesù Kìlistò, mpaasàtà nàbàbàtiizè, pàdibi ànu nè kùdi mùshindù, nànsha díbà adi mene bu yéyè nè mùshindù, kubàbàtiiza dyàkàmwè. Eci cidi cibàbweja mu bwobùmwe bwà beena kwitabuuja. Tudi twitabuuja nè ku dibàtiiza dyà mu màyi nkutùdi babwejiibwe mu bwobùmwe.

15 Kàdi ku dibàtiiza dyà Nyumà Mwìmpè, tudi babwejiibwe mu bidimba, biikàle bidimba byà Mubidi wà Yesù Kìlistò, udi pa buloba bujimà awu.

16 Mpindyewu, cikwàbò cintu citùdi twitabuuja, ncyà nè: “Dimwèneshiibwa dyà Nyumà ndifidiibwe kùdi muntu yònsò bwà kwambulwisha bònsò.” Mpindyewu, tudi twitabuuja nè pàdi mapà aa, nè bikwàbò, munkaci mwà kukwàta mudimu mu Èkèleeziyà, bu mutùdi tujinga kupeta nè tujinga nè bantu bàdi bapèesha mapà kùdi Nyumà abu, bàlwe bwà kukuukwila pàmwe neetù.

17 Mpindyewu, mu myaba yàbùngi, tudi tusangana nè pàdi mapà aa mu bantu, bantu kabèena bùmvwà nè *mmùshindù kaayi* nè *ndìbà kaayi* dyà kukwàta mudimu nè mapà aa to, nè, mu kwenza kwà nàнку, bàdi bàtwàla ànu bundù cyanàànà; citùdi twitabuuja nè ke civwà Sàtaanà mufwànyine kwenza bwà kufikisha beena pambèlu, beena bupidyà, nè bikwàbò, ku dipeta bwòwà bwà dibènesha dilenga dyà dikèma didi Nzambì mupèeshe Èkèleeziyà mu matùkù aa edi.

18 Pòlò mmwambè nè: “Pààlwàku mwenyi munkaci mwètù, kàdi twètù bònsò twakula mu myakulu, muntu awu kàkuya wènda wàmba nè tudi ‘bapàlè’ anyi? Kàdi bu muntu mwà

kwamba cipròfeta, nè kumanyisha bwalu busokòmè bwà mu mwoyi, díbà adi bàvwà bàpòna panshi bàmba nè: ‘Bulelèlè, Nzambì ùdi neenù.’”

¹⁹ Mpindyewu, tudi twitabuuja nè mapà à Nyumà, munkaci mwà beena kwitabuuja, ke cìdì bulongàmè bwà ditùkù edi. Katwèna mwà kwitabuuja nè muntu ùdi mwà kuyiisha ku disonsodiibwa nè pashiishe, anyi, kwikala mulongeshi musonsola, kàdi pashiishe kuvila dipà dyà dyondopa, anyi dipà dyà cipròfeta, anyi dyakula dyà mu myakulu, anyi dyandamuna dyà myakulu, anyi dyònsò dyà ku mapà makwàbò aa to.

²⁰ Pa nànkù, ki bwà cinyi, dyànyì diitabuuja ndyòdì edi mu Dìyì dyà Nzambì, mùshindù wùdi Branham Tabernacle ewu, mu Mùsèèsù wà Mwamdamukùlù nè wà Penn mu Jeffersonville emu, nè cyà kukwàta mudimu. Ndi ngèèla meeji nè, cintu cyà kumpàlà, nè ndi ngiitabuuja nè bintu bìndi ngàmba ebi mbyà mushinga mukolè nè bìdi nè cyà kwenjiibwa mu mùshindù ewu, mu Branham Tabernacle, bwà yèyè kutanta mu Mukalenge. Nènku bu mu díbà kanà dyònsò byòbì ebi, eci mwà kwediibwa mpatà, muntu udi wela mpatà bwà bwalu abu ùdi mwà kumòngana naanyi yèyè kàyì mwà kufika kùdi mpaasàtà, anyi ùdi mwà kumòngana nè mpaasàtà. Pangìikalà kumbèlù, nciyi muye ku yimwè yà ku ngendu to, nêngìikalè nè disànkà dyà—dyà kwambulwisha nànsha ní mwena kwitabuuja anyi mpaasàtà pa díbà kanà dyònsò. Nè bintu ebi mbilondèshile Mifundu, nè ndi ngiitabuuja nè ke bulongàmè bwà Èkéleziyà.

²¹ Ndi ngèèla meeji, dyàmbedi nè, cidimba cyònsò, anyi, mukuukwidi yònsò, wa mu Branham Tabernacle, ùvwa nè cyà kwikala mu dinanga dyà Nzambì menemene kùdi muntu nè mukwèndè mu mùshindù wà bifwànyine...myoyi yàbò mifwànyine kujingangana muntu nè mukwèndè díbà didìbo bàtàpuluka, bàshiyangana muntu nè mukwèndè mu disangisha, ku dilòlò. Mèmè ndi mwena kwitabuuja mulelèlè mu “dinanga dyà Nzambì.” Mùpostòlò Pòlò mmwambè nè ke cìvwà cileeji cyà Nyumà Mwìmpè. “Mu mùshindù ewu, bantu bònsò nebàmanyè nè nudi bayiidi Bàànyì,” mwàkambà Yesù, “panùdì nè dinanga muntu nè mukwèndè.” Nè tudi twitabuuja nè ndinanga dyà Nzambì dykàatùmà Yesù Kilistò pa buloba, bwà kutùfwila twétù bònsò. “Nzambì wàkatàmba kunanga bàà pa buloba, kufilaYè Mwan’Èndè umwèpelè mulela, bwà ewu yònsò wàMwitabuuja kàfù to, kàdi wàmòna mwà kwikala nè Mwoyi wà kashidi.” Nè *Mwoyi* wà kashidi mwab’ewu wùdi “Mwoyi Sungasunga wà Nzambì,” bwalu tudi tulwa bàna bàà balùmè nè bàà bakàji bàà Nzambì, ku dibàtiiza dyà Nyumà Mwìmpè; didì Dimiinu dyà Abraham, nè ùtùpèèsha diitabuuja dìvwà naadi Abraham adi, pààkiitabuujiyè Nzambì kumpàlà mene kwà kwikalayè mutengùdìlìbwe.

²² Mpindyewu, cintu cìdì cilondà, tudi twitabuuja nè bìdi bikèngela bwà bakuukwidi aba “kudìsangishabò pàmwè, bantu

bàdì nè mapà aba,” bu mùdì myakulu, nè bantu bàdì bàpeta mabuulula nè dyandamuna dyà myakulu, nè bikwàbò. Bidimba ebi, anyì, beena kwitabuujà aba’s wè, èyowà, bìvwa bikèngela bwà kudisangishabò mu tusunsa twòtù tukesè makùmi ànaayi nè tùtaanu anyì díbà dijimà kumpàlà kwà masangisha kutwàdijawù. Bivwa bikèngela bwà èkèleeziyà kukàngudiibwayè kumpàlà kwà díbà, nè beena kwitabuujà bàdisangisha mu malòòlò aa, kàdì mu tusunsa tutwè ku makùmi ànaayi nè tùtaanu nànsha díbà dijimà kumpàlà kwà masangisha kubangawu.

²³ Ngèèla meeji nè, Branham Tabernacle ewu misangu yònsò bìvwa bikèngela ikalè nè mwimbi wa pyànò mùle tètè nè Nyumà, uvwa mwà kulwa kumpàlà kwà díbà, mùle tètè nè Nyumà Mwímpè, nè mufwànyine kwimba bitùùlùbitùùlù, bitùùlùbitùùlù byà menemene, mujiki wà nyumà, bu nè: “Ku nkùrusè kwàkafwilà Musùngidi, kuntwaku bwà kukezudiibwa ku mpèkaatù Mémè kudila mwadi; kwòkù aku nkwàkalaabiibwà Mashi ku mwoyi wànyì, butùmbi kùdì Dìnà Dyèndè!” Cintu kampàndà cyà mùshindù awu. *Pabwìpì Neebè, Nzambi Wanyì.* “Lubwebwe lwà Bikondo, lupanda bwànyì mémè.” Anyì, *Pabwìpì Nè Nkùrusè*, anyì cintu kampàndà cyà mùshindù awu; nè kalolo kònsò, bitùùlùbitùùlù, pàdiye munkaci mwà kwelangana meeji díbà dyònsò pa Nyumà Mwímpè, mulùme anyì mukàjì, cyònsò cidiye mufwànyine kwikala aci.

²⁴ Díbà adi mémè ndi ngìtabuujà nè bakuukwidi, pàdìbo bàbwela, bìvwa bikèngela bàbaakidilè, nè byàbò. . . bàkùdika nkooci yàbò nè bifulu, bàbàleeja myaba yàbò yà kusòmba, nè mwakidilu mulenga ùdì ànu bawìsiyè anyì balami buujìibwe tètè nè Nyumà Mwímpè mwà kwenza awu, nè mu dinanga, bwà kumòna Èkèleeziyà wa Nzambi udi nè mwoyi ùtùngunuka nàнку.

²⁵ Bòbò bakuukwidi aba kabèna nè cyà kuyiikidishangana muntu nè mukwèndè nànsha, nè kwikala bàyiikilangana eku nè eku, nè bènza mutooyi mu èkèleeziyà nànsha.

²⁶ Bidi bikèngela bwà kudisangishabò. Dyàmbedi, bàdifinda mu disambila dyà cimùmà, pàmwápa ku cyoshelu, bwà katancì kakesè cyanàànà. Kí ndisambila dyà díyì dikolè to, udi wimanyika muntu mukwàbò; disambila dyà cimùmà, udi mu dikuukwila. Lekèlaayi aci cibwelè. Kukuukwila, mu nyumà webè, pashiishe kwalukila ku mwaba webè.

²⁷ Anyì, kabyèna bikèngela bwà wèwè kuya ku cyoshelu to. Bwela wèwè ànu cyanàànà wangatè nkwasà, ùsombelè panshì, utèeleje mùjiki; ubwita kwìsù, winyika mutù; nè, mwikàle mu cimùmà, munkaci mwà kukuukwila Nzambi, ntàntà yònsò awu.

²⁸ Díbà adi bu Nyumà mwà kubuulwila mukwàbò cintu kampàndà, anyì—anyì muntu kampàndà mùjìibwe tètè nè Nyumà mu mùshindù wà mufwànyine kwakula mu myakulu,

dìbà adi bìvwa bikèngela bwà muntu ewu kujuukayè nè kufila mukenji. Nènkù muntu nè muntu ùdi nè cyà kushààla mupùwe too nè pàdi dyandamuna dilwa.

²⁹ Pàdi dyandamuna dilwa, kadyèna nè cyà kwikala ànu ditèèlè dyà Mifùndu, anyi cintu kampàndà cidi kaciyi nè dyumvwija to. Cidi nè cyà kwikala mukenji muludikila Èkèleeziyà, cyanaàna tudi twela meeji nè ncifwànyine kwikala cyà mu mubidi; byà nànkù tudi babimòne búngi cyanaàna. Nènkù mpindyewu, ndi—ndi ngèèla meeji nè, Nyumà ù—ùvwa nè cyà kwakula ànu bwà “dikoleshiibwa dyà Èkèleeziyà.”

³⁰ Nènkù mpindyewu, ncifwànyine kwikala mukenji, cintu kampàndà cyà mu mùshindù ewu, pàmwàpa. Pàmwàpa bantu bàkaadi bàdisangisha pa diinè dìbà adi, bàmwè babèèdi mbabwèlè. Pàmwàpa kùdi muntu mulààle panshi, mucibùkile panshi anyi cintu kampàndà. Kacya kanùtuku bânji kumumòna kwònsò eku to. Kàdi piikalà dyandamuna mwà kulwa, ndifwànyine kwikala cintu kampàndà cyà mu mùshindù ewu; pàdi dyandamuna dilwà, anyi ewu udi ufùma ku dyakula awu, mufwànyine kwamba nè: “Èè, EMU MMÜDÌ MUKALENGE WÀMBA, muntu udi munkaci mwètù awu mmufùmine ku mwaba *kampàndà*,” nè ùmvwija mwaba awu. Nè ùvwa mufwànyine kwamba nè: “Yèyè mmutekète bwalu, kùkaadi bidimu bìsàtù anyi bìnaayi,” anyi cyònsò cìdici cifwànyine kwikala aci, cidi bwalu mwà kwikala, “wàkenza cintu kampàndà cyà cibi,” bu mùdi nè, “wàkashiya mukàjèndè nè bânà, kàdi kunyeema kubàshiya. Nènkù mmukùlùke ku cibàndilu,” anyi cintu kampàndà cyà mùshindù awu, “nè yèyè kutàpika, nè kucibukilayè panshi. EMU MMÜDÌ MUKALENGE WÀMBA, yèyè munyingalàle bwà cyòci aci, nè mulayè bwà kuya kùdi mukàjèndè nè kupungishangana nendè, dìbà adi yèyè neòndopiibwè mpindyewu nè neàpinganè kùdi dikhù dyèndè.”

³¹ Nè pashishe kumpàlà kwà muntu kanà yònsò ewu kwambayè ní ncinyi cyònsò, kùvwa nè cyà kwikalakù bàbìdi, anyi bapite apu, bantu balùme anyi bantu mu nzùbu emu, bàdi bashindàme mu nyumà mu Dilongesha dyà Èvànjeeliyò, bàdi nè dijingulula dìmpe dyà nyumà, nebàjuukè kuulu bàmba nè “Ncyà kùdi Mukalenge.”

³² Nènkù cintu eci cyòci kaciyi cyènzèke to, dìbà adi kabìvwa bikèngela bwà myakulu kwikalayi yitèèdiibwa mu èkèleeziyà to. Muntu yèyè wàkula mu myakulu, Pòlò wàkamba nè: “Kwòkò kakùyi mwandamunyi to,” nè bikwàbò, “bàkwilè kumbèlu,” anyi pònsò pàdibo mwà kwikala apu, “bwalu bàdi ànu bàdibènesha bòbò nkààyaabò, kàdi kí mbwà dikolesha dyà Èkèleeziyà to.”

³³ Pashishe muntu ewu, paanyimà pàà yèyè mumanè kwakula, nè dyandamuna; nè pashishe bàbìdi anyi bàsàtù bàlumbulwishè, bilondeshile Dilongesha dyà Pòlò Munsantu

dyà mu Bible, bwà nè cidi nè cyà kwikala “cilumbulwishiibwe kùdi banzuji bàbidì anyi bàsàtù.”

³⁴ Dìbà adi muntu udiYè mutèèle awu àye, nè Yèyè, pàmwàpa mMufwànyine kuteela muntu kampàndà, anyi mpaasàtà anyi muntu kampàndà, bwà kuya katentekela muntu ewu byanza, nè udi usaama awu anyi mu lutàtu, nè yèyè neòndopiibwè. Dìbà adi mpaasàtà anyi muntu mukwàbò, nànsha yèyè nganyì uvwa musungula kùdi Nyumà Mwìmpè awu bwà kuya “kasambila disambila dyà diitabuuja,” bàye kakwàta mudimu nè muntu awu bilondèshile cidi Nyumà mwambè. Pashiishe pa dìbà adi, muntu udi pa . . . Nè cyònsò cidi Nyumà Mwìmpè mwàmbè aci, necyènzekè, dyàkàmwè, ànu mùdi Nyumà Mwìmpè mucifile amu.

³⁵ Nè pashiishe bantu bàvwa mwà kucyònkómoka, nè kwikala nè kusàkidila, nè kutùmbisha nè kukuukwila Nzambì, bwalu Nzambì mmuswè bwà kukuukudiibwa.

³⁶ Dìbà adi bàdi nè cyà—dìbà adi bàdi nè cyà kwinyika mitù yàbò nè kwikala cyàkàbidì mu disambila, bwà kumòna ní kùdikù mukenji mukwàbò wùvwà Nyumà Mwìmpè mufwànyine kuswà bwà mapà aa kumwèshawù, kumpàlà.

³⁷ Nè pashiishe dìbà kanà dyònsò diikalà muntu mwà kwakula mu myakulu, nè kwandamuna, nè ba—balumbulwishi mwà kutùma muntu awu bwà kwangatayè, bwà kwenza cyònsò cìvwà cyambiibwe bwà kwenjiibwa aci, kàdi kaciyi cyenzèke to, dìbà adi musùmbà mujimà wàbò awu newùye ku cyoshelu nè kwòkò aku kulòmba Nzambì bwà kuumushayè nyumà awu kùdibo, bwalu kakwèna muntu nànsha umwe udi mufwànyine kuswà nyumà wa mùshindù awu to. Tudi bafwànyine kumanya nè mmufwànyine kwikala wa mashimi, nè mmufwànyine kwikala wa mwena lukunà, nè kî ngwa kùdi Nzambì to, bwalu Nzambì ùdi mwà kwamba ànu bulelèlà. Aci cyùmvwikèku bitòòke tòò kùdi èkèleeziyà, kumpàlà kwà nwènu kubanga eci, bulongame bupyabùpyà ebu.

³⁸ Dìbà adi, pàmwàpa, pàngà apa ncifwànyine kwikala cintu kampàndà bu eci nunku ewu, mukenji mmufwànyine kwambila mwanèètù kampàndà, pàmwàpa nè, twàmbè nè, mmufwànyine kwamba nè: “Úvwa musòmbèle ku njila wa njanja,” anyi cintu kampàndà, “bwà kumufikisha ku dyumukakù, bwalu nekwenzèkè njiwu mu njila,” anyi cintu kampànda, anyi cintu kanà cyònsò cyà mu mùshindù awu.

³⁹ Nènku balumbulwishi, paanyimà pàà bamanè kufila dyanyisha kùdi èkèleeziyà bwà kwakula, anyi bwà kutùmikila mukenji ewu wùvwà wùfùminakù ku dipàtuka, piikala dilumbulwisha dyàbò dyà nè: “Neyà kùdi Nzambì,” dìbà adi tàngilàayi nùmonè ní cidi cyènzeka.

⁴⁰ Nènku cyòci cyenzèke, nùsàkidilè Nzambì, nwikalèku nè kusàkidila—nè kusàkidila mu mwoyi wènu kùdiYe. Nè nùMupe

butùmbi nè dikuukwila, nè kwikala badìpwekèshe. Kumutù kwà bintu byònsò, kwikala badìpwekèshe.

⁴¹ Kwikadi wadyùja wèwè mwinè mu mùshindù wà ufika ku diikala mumanyè kupita nè mpaasàtà webè anyi èkèleeziyà ùdi ukuukwilamù awu to. Wèwè mufikè mu aci cipidi, dîbà adi ndi mwà kubela yònsò wa kunùdì bwà kupeta mwaba mukwàbò wà dikuukwila. Bwalu, ndi ndòmba mpaasàtà bwà kàanyishidikù kantu nànsha kàmwè pambèlù pàà bulongàme bwà Bible to, mùshindù wutùdì bacimòne mu èkèleeziyà emu. Nè pashìishe tudi baswè bwà mapà aa kwikalawù bàkwàta naawù mudimu, nè pa kaaba, nè bakuukwidi. Bwòbò bakwàta mudimu nè mapà mu mùshindù mujaalàme, bilondèshile Dìyì, nenùmonè èkèleeziyà wa bukòlè, mulenga wa dikèma mu mudimu bwà Mukalenge wetù Yesù Kilistò.

⁴² Mpindyewu, pashìishe cintu cìdì cìlonda cyènzekà, ncyà nè pìikalà bantu bàvwà nè, biikàlè bàpàtuka mu bulongàme munda mwà bikondo ebi abu, mulami anyi wisiyè kampàndà udi mùlè tètè nè Nyumà Mwìmpè nè mwikàke nè ngàsà wabùngì munda mwà mwoyi wèndè, neàye kùdì muntu awu, nè kaneemu kònsò, bu mùdì taatù, nè nebàbàlongolole mùshindù ewu. Anyi, mpaasàtà, nànsha yèyè mwikale nganyì, cìdì cifwànyine kwikala nè mushinga mutàmbe bunène bwà balami kwenzabò nànkù; bwalu mpaasàtà, pa dîbà edi, pàdì masangisha à nyumà aa munkaci mwà kwenzeka, bìvwa bikèngela kwikalayè mu cibambalu cyà disambila, anyi mwaba kampàndà, munkaci mwà kusambila.

⁴³ Mikenji eyi, dîbà adi, kwòkù kakùyì mikenji kampàndà yènda yitùngunuka, kakùyì mabuulula to, dîbà adi bantu's mbafwànyine kwikala nè dyèsè, bòbò baswè, bwà kujuuca bwà kufila bujaadiki, ànu bwà butùmbi bwà Nzambi. Kì mbenzèjìibwe bwà kwenza cyòcì eci nànsha, kàdì majaadiki àvwa nè cyà kufidiibwa kumpàlà kwà diyiisha anyi mudimu kanà wònsò wà misambu kubangawù, anyi ní ncinyl cyònsò, majaadiki mu masangisha à dikuukwila aa.

⁴⁴ Nudi nuumvwa, nwènù èkèleeziyà, nè, mu kwenza kwà cyòcì eci, nudi nè èkèleeziyà mujimà mu nyumà wa dikuukwila, kumpàlà kwà Dìyì kubweladì bwà kulongeshiibwa? Dîbà adi Nyumà Mwìmpè ùdi ùbwela mu Dìyì, nè ùmwènesha Nzambi ku Dìyì, bwà kwikalaci dishindika dyà dikuukwila dyènù.

⁴⁵ Mpindyewu, pashìishe paanyimà pàà cyòcì eci, ndìbà dyà mpaasàtà kulwayè, pìikalà mikenji yènda yitùngunuka... Twàmbèbi nè, bìvwa bikèngela bwà mpaasàtà àpatukè ànu menemene, twàmbè nè, pa dîbà mwandamutekète nè tusunsa makùmi àsàtù, nè...anyì tusunsa dikùmi nè tùtaanu kumpàlà kwà dîbà mwandamukùlù. Nènku mikenji eyi yòyi mikàlè ànu yitùngunuka, kumpàlà kwà mpaasàtà kulwayè ku wèndè...kupàtukayè mu birò byèndè, anyi kwònsò kùdiye

mwà kusanganyibwa aku, bwà kwangata kaaba kèndè pa cibùmbà cyà ku cyambilu apu, bivwa bikèngela bwà mwanèètu kampàndà àmwambile, bwalu bansantu mbamanyè nè pàdì mpaasàtà ùlwa pa cibùmbà cyà ku cyambilu, dîbà adi ncikondo cyèndè bwà mudimu. Nènku aci cidi cifila cikondo, cikùmbàne bwà mamwèneshiibwa ónsò à mapà, bwà kubweja Nyumà wa Nzambì mu—mu disangisha.

⁴⁶ Kàdi byôbì mwà kwenzeka nè kwikalè mwena bupidyà kampàndà muntwamu, mwikalè ùtèèka cimvundù; muntu kampàndà wa mwoyi wà kalolo ùdi mwà kuya kùdiye, bu mùdì wisiyè anyi mulami, nè bafwànyine kumwambila nè ùvwa—ùvwa mwà. . . kumwambila bwà kwikalayè mushààle mu kaneemu, anyi kwikala mu kaneemu pàdi disangisha diikàle mu bulongàme apa. Bwalu, Nyumà ùdi mu nzùbu emu, nè mapà à Nzambì àdi munkaci mwà kumwèneshiibwa bwà dikoleshiibwa dyà Èkèleeziyà. Nè muntu ewu bàdi nè cyà kuyiikilangana nendè mu dinanga, kàdi kî mmu dyumisha dyà maalu to. Anu byôbì bifike mu mùshindù wà nè bàvwa munkaci mwà kunwà maalà, anyi beena cishikù kampàndà, anyi cintu kampàndà cikwàbò cidi cifwànyine kubwelakana nè dikuukwila dyà—dyà Mukalenge, cidi mapà, dîbà adi, miikàle munkaci mwà kumwèneshiibwa; dîbà adi bivwa bikèngela bwà muntu awu kwikalayè, kufwànyina, anyi kwikala mulombòdiibwe ku luseke kampàndà, ku cimwè cyà ku bibambalu bìdi paanyimà, anyi mwaba kampàndà, nè kuyiikila nendè, nè kutàngila bwalu bwèndè, mu kalolo kònsò.

⁴⁷ Mpindyewu, pàdì mpaasàtà ùlwa pa cibùmbà cyà ku cyambilu apa. . . Paanyimà pàà mpaasàtà mumanè kufika pa cibùmbà cyà ku cyambilu apu, ndi mufwànyine kwamba nè, bu mùdì Branham Tabernacle ewu, bwà mpaasàtà kulombola disangisha mu misambu yôyi mikesè ùmwè anyi yìbìdì mîmpè. Bwalu tudi bacisangàne mu mùshindù wà nè, pàdì bààbúngì bàteeta kukwàta mudimu nè. . . mu èkèleeziyà, cidi citwàla ànu lutàtù. Ndi mufwànyine kuleeja, bu mungàkenzà pàmvwà ndombola èkèleeziyà; mvwà ndombola misambu, nkààyaanyì. Nè ndi ndyùmvwa nè ncifwànyine kwikala cintu cîmpè bu mpaasàtà mwenzè nànkù, yèyè mwinè.

⁴⁸ Nè mu masangisha ónsò à milòmbò, mùdìbò badisangishe pàmwè, bisumbu byà masangisha à milòmbò, mpaasàtà ùdi nè cyà kwikala mu dyònsò dyà kùdìwù. Kadivwa mwà kushààla mu byanza byà muntu-nkààyà yònsò ewu bwà kulombolayè masangisha bu nànkù to. Bwalu tudi bacisangàne mùshindù wà nè, bàdi bàpàmbuka mu njila, pa dilongesha, nè pashiishe bàlela, bàcibweja buludì mu èkèleeziyà, nè, misangu yàbúngì, bìtwàla matomboka, nè bikwàbò, bìdi kabiyi byà mu Èkèleeziyà wa Nzambì udi nè mwoyi to. Nè bivwa bikèngela bwà mpaasàtà kwikalayè ku masangisha ónsò à milòmbò, nè bikwàbò, mwaba wùdi masangish- . . . àdisangishila awu.

49 Nènku mpaasàtá kàvwa nè cyà kutwà ku cyà luseka lùmwe nànsha mu disangisha, mu kwamba kwà nè kùdi kasumbu kàmwe elu luseke nè kakwàbò lwàhwa luseke. Bìvwa bikèngela bwà mpaasàtá kwimanayè pankaci pààbò bònsò bàbìdì abu, nè kubàfikisha ku dipungishangana, dyàkàmwe. Kàdi yèye kàyì mwà kubàpungisha to, àngatè mulami kampàndà. Nè pashìishe bóbò—bóbò kabàyi baswè kuteeleja nànsha mpaasàtá anyì mulami to, díbà adi bìvwa bikèngela kwambila èkèleeziyà, nènku, bu mwàkambà Yesù nè: “Bìikalè kunùdì bu bampàngaanù nè bampùblikaanò.” “Nè cyònsò cinwàswikà pa buloba,” mwàkambà Yesù, “Mémè nènciswikè mu Dyulu, nè cinwàsùülulà pa buloba aci, Mémè nèncisùülulè mu Dyulu.”

50 Mpindyewu, pàdì mpaasàtá ùlwa pa cibùmjà cyà ku cyambilu apa, mpaasàtá àlombolè díbà adi, nànsha—nànsha nànkù, musambu wùmwe anyì yìbìdì, nè àye buludì ku Dìyì.

51 Kakwèna díbà bwà masangisha à majaadiki male nè muntu yònsò ùjuukila kuulu, mwikàle nè díyì dyà kwamba. Aci kacyèna cìtanta mu Branham Tabernacle to.

52 Pìikalà bantu kanà bònsò bàdì munkaci mwà kutèeleja mukàbà wà mèyì ewu, nènku, nwènù, byòbì byende bìmpè mu èkèleeziyà wenù, èè, aci's cìdì ànu cìmpè menemene. Nè twètù tudì nè disànkà dyàbúngì bwà bwalu abu, bwà mùdici cìtanta mu èkèleeziyà wenù.

53 Kàdi mu wetù emu, kacyèna cyènda bìmpè to, cìdì cìlela ànu cibwejàkàjì nkààyaaci. Ndi mpaasàtá kaaba aka kùkaadi bidimu makùmi àbìdì nè byà mu njila, nè ndi musangàne nè cìdì cìlela ànu cibwejàkàjì. Wèwè mwikàle nè bujaadiki, bùfilè kumpàlà kwà. . . mu disangisha dyà bantu, pàdì Nyumà munkaci mwà kubènesha, nè bikwàbò.

54 Anyì, mùshindù mulelèlè wà kufila bujaadiki, kì mmu èkèleeziyà to, mmu myaba ya mifitù. Bukènkè bwènù bukenkeshè mwaba wùdì mídímà awu. Ndààyi mu binwìnù byà maalà nè mu myaba mishìilèshìilàngàne, nè mu myaba yìdì mpèkaatù nè bikwàbò munkaci mwà kwenda kungwila mushiki, díbà adi lekèlè Bukènkè bwèbè bukenkeshè. Ke mwaba wà kucyènza ngwòwò awu.

55 Kàdi, nànsha nànkù, bu Mukalenge mwà kukubènesha nè kukupèesha dibènesha kampàndà dinène dyà pabwàdì, anyì cintu kampàndà cinùdì nè cyà kwambila bantu, kucyènza mu cikondo cyà disangisha dikwàbò, mpàlaa-mudimu, byà mbilangilu wa masangisha, anyì pàdì Nyumà munkaci mwà kubènesha nè kufila majaadiki nè mabuulula, nè myakulu nè mandamuna, nè bikwàbò, mu dikuukwila, dyà bansantu, kumpàlà kwà Dìyì dyà Nzambì kutwàdiibwadì.

56 Díbà adi mpaasàtá, paanyimà pàà mumanè kulombola musambu ewu, neàlombolè dyàkàmwe èkèleeziyà mu disambila, nè disambila dyà disangisha, yèyè mwìnè, pàdiye mwimàne

pa cibumbà cyà ku cyambilu apu, ùlomba bakwàbò abu bwà kwinyikabò mitù yàbò mu disambila.

⁵⁷ Eci tudi bacisangàne nè ndibènesha ditàmbe bunène, nè citàmbe kwikala bulongàme mu dikwàta dyà mudimu munda mwà èkèleeziyà.

⁵⁸ Nè pashiishe, cintu cìvwà cìlondà cìvwà cikèngelà bwà mpaasàtà kwenzayè dîbà adi aci, paanyimà. Bu nè bàvwa nè disangisha dyà nyumà dilelèlè, nè mapà àmwènesha minsokòntù yàbúngì yà mu myoyi yà bantu, nè bintu bìvwà nè cyà kwenjiibwa ku mapà mu disangisha; dîbà adi Nyumà wa Nzambi ùdi mu disangisha, nè mbipeepèle menemene dîbà adi bwà mpaasàtà kupeta Nyumà wa Nzambi (ukàadi mumane kwikala mu masangisha) pa Dìyi dyà Nzambi, pàdiye ùbala nè ùbanga kuyiisha apu. Mpaasàtà dîbà adi ùdi ùyiisha cyònsò cidi Nyumà Mwímpè mufwànyine kutèeka pa mwoyi wèndè aci, cyònsò cidiye muswè kwenza aci, mwimàne mwaba awu.

⁵⁹ Kàdi disangisha didi ànu bwà . . . Bàdi mwà kucyònkomoka, pàdiye munkaci mwà kuyiisha apu, mu bushùwà bwà bwalu, anyi kwamba nè “amen” pàdi Dìyi dipàtuka apu. Kàdi, bwà dijuuka nè difila dyà mikenji mu myakulu nè dyandamuna, pàdi—Nyumà Mwímpè ùkwàcila mudimu ku mpaasàtà apu, Mufundu wùdi wùpiisha cyòci aci, wàmba nè: “Nyumà wa baprófeta ùdi ùkòòkela muprófeta.”

⁶⁰ Mpaasàtà dîbà adi ùdi nè cyà kulongolola muntu-nkààya ewu, nè kumwambila bwà kwikalayè nè kaneemu nè kushàala pa kaaba kèndè. Mpaasàtà ùdi nè cyà kwikala muntu udi mudipwekèshe menemene mu byenzedi byèndè, kàdi kàyi mutàmbe kudipwekèsha byà ùpanga mwa kwikala bu pààkamònà Mukalenge Yesù Kilistò cilèma munkaci mwà kwenzeka mu èkèleeziyà, Wàkaluka myonji nè kubipataYè mu èkèleeziyà. Nènku mpindyewu Èkèleeziyà wa Nzambi ke nzùbu wa cilumbulwidi, nè mpaasàtà ngudi mulongo ùdi mutàmbe kutumbuka mu Èkèleeziyà. Mukùlù awu ncintu cidi citàmbe kutumbuka mu Èkèleeziyà wa bàpostòlò, pa kuumusha Nyumà Mwímpè. Nyumà Mwímpè ùdi ùfikisha Mukenji Wèndè buludi kùdi mukùlù, nè mukùlù ùWùpèèsha cisàmbà.

⁶¹ Bansantu nè mapà àbò nebìikalè nè cyà kwangata kaaba kààbò, dyàmbedi, bwà kukuukwila nè kudisanga, cidi citwàla (múngàmbi kumpàlà amu) Nyumà wa Mukalenge, mu nzùbu emu, bwà mpaasàtà. Nènku cidi citàmbe kupeepejila bikolè Nyumà Mwímpè bwà àkwacilè mudimu munda mwèndè dîbà adi, dîbà didi disangisha dímpè dyà nyumà didyànjidile dilongesha dyèndè; nè dîbà adi Nyumà Mwímpè ùdi ùbwela mu Dìyi nè ùlongesha Dìyi; mufùme ku dimwèneshiibwa ku mapà.

⁶² Nè pashiishe dibìikila dyà ku cyoshelu didi munkaci mwà kwenjiibwa dîbà adi, paanyimà, nè bààbúngì dîbà adi nebàmonè nè nebàmanyè, bilondèshile dyenza dyà mudimu dyà Nyumà

Mwîmpè, nè Dìyì dyà Nzambì, pàdì mpaasàtá ùDìshìkìkápù, nè nudi Èkèleeziyà wa Nzambì udi nè mwoyi. Nènku ànu bu mwàkamba Pòlò, wa kale awu nè: “Neàpone mpàla panshì wàmba nè: ‘Bulelèlè, Nzambì ùdi neenù.’”

Mpindyewu, mu bintu ebi, byènzekè nè kaneemu kààbùngì.


⁶³ Nènku mpindyewu kùdì mpaasàtá (kùdì Mwanèètù Neville, pa dîbà edi), vùlukàayi nè yéyè ùdi mfùmù mu kaabujimà wa èkèleeziyà. Mwanèètù Neville ùdi nè bukenji bwà kukwàta mudimu nè bukòokeshi kanà bwònsò bùdì Nyumà Mwîmpè mufwànyine, cyònsò cìdì Nyumà Mwîmpè mufwànyine kumwambila bwà kwamba aci, mu ngaakwilù mukwàbò. Mu èkèleeziyà, yéyè ùdi nè bukenji bwà cintu kanà cyònsò cìdì Nzambì mufwànyine kumulombola bwà kwenza aci. Yéyè ùdi kàbìdì nè bukenji pa kasùmbù kèndè kàà balami. Ùdi mwà kushintulula kasùmbù kàà balami, balubuludi, anyì—anyì mwimbi wa cisanji cyà pyànò, anyì mudimu mukwàbò kanà wònsò wà mu èkèleeziyà wùdiye ùjinga kushintulula awu, ùdyùmwa mulombòdìibwe kùdì Nyumà Mwîmpè bwà kwenza nànkù. Nè cyònsò cìdìye wènza aci, mèmè nènciitàbè, bu mùdìye (mùndì ngiitabuuja nè) mmuntu wa difwànà dyà Nzambì. Nènciitàbè nè ncyà kùdì Mukalenge, nè nengiitabe cintu cìmwècìmwè aci, ki bwà cinyì cidi cìmupà bukòokeshi dîbà adi bwà kulombola èkèleeziyà mu mùshindù ùdiye ùdyùmwa mulombòdìibwe bwà kucyènza awu. Mpindyewu, anyì, mudimu kanà wònsò mu èkèleeziyà, yéyè ùjinga bwà—bwà—bwà kushintakaja myaba, yà bantu, bwalu yéyè ùdi nè bukòokeshi bwà kucyènza. Cìinè aci, ndi ntèkemena nè eci neciikalè misangu yònsò ànu mu dinanga nè dishintakaja edi kadyàkukèngediibwakù to.

⁶⁴ Mpindyewu, Mukalenge ànùbènèshèku bònsò. Nè ndi mutwìshìibwe nè bintu ebi nebyènjiibwè ku dyènù pèènù dimanya dyònsò. Nènku Nyumà Mwîmpè àtabaleelèku yònsò wa kunùdì.

⁶⁵ Mwena mudimu yònsò wa mu èkèleeziyà àkùmbajèku mudimu pa kaaba kèndè kàà mudimu, mumanyè nùnkù ewu, nè Nzambì nèakwimikilè bujitu bwà mùshindù wùdì wèwè mukwàte wèbè mudimu mu èkèleeziyà. Muntu nè muntu neikalè nè cyà kulumbulula.

⁶⁶ Nè kùdì beena kwitabuuja bònsò, nè bansantu bananga bàdì nè mapà bàdì mu èkèleeziyà wetù abu, aba bàdì—bàdì bàmba bipròfeta, anyì bààkula mu myakulu, anyì bàndamuna, anyì bàpeta mabuulula, tudi ànu nè disànkà dyàbùngì dyà kwikalakù neenù mu èkèleeziyà. Nènku netwèlanganè neenù dibòko dyà mu mudimu mu kaabujimà mu byònsò byàjaadikà Nyumà Mwîmpè nè Yéyè mmunwambilè abi. Nènku tudi banùnangè. Nè tudi twitabuuja nè mapà aa àdì munda mwènù, nè nwènù nè mpùngà mujaalàme, nè dicileeja dyàcì dyà mu Mifùndu, aci necinùvwijè

beena mudimu banène munkaci mwètù. Nènku Mukalenge ànùbènèshèku bônso, ke disambila dyànyì dyà meeji matòòke ndyôdì adi.

⁶⁷ Beena Kilstò, mu ditèeleja mukàbà wà mèyi ewu, ndi nè cintu cìmwèpelè cìndì mumòne nè ndi mushiye, nè ncyôci eci: bwà nè, pàdì bantu bààkula mu myakulu, cìdì nè cyà kwikala ku muntu ku muntu “bàbìdì anyì bàsàtù,” bilondèshìle Mifùndù. Mbwena kwamba nè, kùdì mikenji ànu yìbìdì anyì yìsàtù cyanàànà yìdì yìkèngela kufila mu mudimu wònsò musungùlùke. Paanyimà pàà cyôci aci bilondèshìle Mifùndu, nè: “Ebi nku muntu ku muntu; eci cìdì nè cyà kwikala ànu bàbìdì cyanàànà, anyì bàsàtù.” Pa nànkù swâyì nwenze bintu ebi, bilondèshìle mùshindù wùdì Nyumà Mwímpè mubiludikè mu Bible Wendè. Nènku eci cìdì, bilondèshìle dyànyì pàànyì dimanya, mùshindù wà kucyènza. Pòlò mmwambè nè: “Bìikalè ku muntu ku muntu, bàbìdì anyì bàsàtù, pàdìbo bààkula apu.” Mukalenge ànùbènèshè. 

58-1007 Bulongàme Bwà Èkèleeziyà
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org